

Jano Blacas de la Pampeto

Li Conte dóu Matagot



C.I.E.L. d'Oc


Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/guests/ciel/>

I

La Garamaudo



Toustèms

Lou tèms?

Eternita de la roucaredo nuso, de la terro mouisso vo secarouso, de l'erbo fino, di flour precieuso, que subre-viéuran à l'ome terradouren.

Eternita dóu vènt fugidis e bramaire couchant li niéulo de coutoun-ramo candi, lou tèms d'uno daiado umano.

Eternita de l'estelan que revouluno dins lou cèu ensourni desempièi la debuto dóu Mounde.

Eternita di quatre sesoun, chasque an respelido, pèr escantiha li bèn de la terro.

Eternita de la mar óoriginalo bressant li countinènt.

Eternita di volcan que conton l'aventuro nostro, regisclant si secrèt tre la frechaio souteirano.

Eternita de l'èr inchaspable que carrejo li gréu de la fegoundita tant bèn que li parfum sutiéu vo pudènt, barrulant souto la capo dóu soulèu.

Adounc, Tèms sourd coume un toupin, emai tucle!

Que noun! Lou tèms es lou dre à la vido: vido pouderoso de l'ome, vido inchaiènto vo espourido de la bestieto, vido fruchoso de la planto menudeto cavihado à soun racinage. An de leissa sa piado, meteore travessant lou cèu de l'Eternita. Soun inteligènci, soun istint, soun esta, fargon la cadeno de la couneissènço, de fes esclapado mai sèmpre renadivo, qu'asseguro nosto presènci toustèms sus terro.

Ansin sounjo Matiéu, au lumenoun de soun eistènci.

E éu, de qu'a fa pèr buta à la rodo de l'Umanita? Siguèsse un saberu, un mèstre d'affaire, escassamen un furnaire de trèu, tant aurié adu sa pèiro au clapié. Que nàni: n'a fa verdesco qu'emé si dous fiéu. Pecaire! L'un mouriguè à la guerro, l'autre siguè aclapa souto uno veituro.

Paure ome! A l'ouro d'aro, s'es recata dintre soun bastidoun, coume uno bèsti amalautido, alassado de viéure, que s'en vai faire li darrié badai dins la roumiado. A plus ges de voio. Asseta sus lou lindau que tant de quiéu n'an fa lusi la pèiro, tiro sus soun cachimbau.

De que vèi tout d'uno? Un loubri que se trigouso au sòu, proche la moulounado de cenho terrouso que n'es eissi:

- Tè, n'en vaqui un qu'a sa plaço sus terro. Aqueste verme tèn sa cambado dins l'acourdanço universal.

Lou brave vièi plego li parpello, e clino la tèsto: de-segur es à mand de pantaia l'astrado de la babo la mai menudeto que Terro porte.

* * *